

Gränzgänger



Zeedel 2024

Die Haimedloose vom Spalebärg

Z Basel am mym Rhy

Joo, do isch Mänggs verby !

Dr Luft wäjt nimm so rot und blau,
dr Himmel isch jetz grien statt grau,
d Innerstadt lyydet vom Baustelle-Gau,
allbott macht e Demo Radau,
blaui Parkplätz fääle au,
und gueti alti Gschäft sage «tschau».
D Gründ kennt d Politik genau !
Und wäge fremde Gwinnvestoore,
hänn Basler e gsellschaftligi Haimed verloore !

Z Basel an mym Rhy – es blybt ys d Nostalgi.

Ganz truurig isch das am Spalebärg:

Dert isch e Blattgold-Asset-Sekte am Wärgg !
Die macht iber Nacht s Hotel Basel zue
(hätt dänck mit em Konto in Züri z tue !)
Alli Basler hänn s Hotel Basel gschetzt,
und im Spärber dr Schnabel gwetzt und gnetzt.

Originelli Duurgescht, Dame und Heere,

stürze vom Stammtisch unbrämst ins Leere !
Spalebärger Ladebsitzer,
Professionelli Ummesitzer,
Studänte, au die wo e Vorlääsigg schwänze,
Die wo mit gscheite Sprüch wänn glänze,
Cabarettische, Illusionische,
Fauteuil-Kinstler und -statische,
Kryz- und Quer- und an Alles-Dängger,
Professore, Dailzyt-Bängger,
Die wo Schlange steen bim Gilge,
und denn dr Gluscht no Moules wänn tilge.

Gweenligi und prominänti Raari
keere in dr Spärber Bar y,
e richtigs Allzyt- Charivari !

Fir alli isch fertig mit luschtig und froo sy,
si wärde iber Nacht Haimedloosi.

Fir d Hotel Basel-Community

Isch ganz vvyll Lääberqualiteet verby !

Z Basel an mym Rhy – wo kenne mr jetz no sy ?

Fir d Fasnächtler isch das e Katastroofe !

Si kenne dert nimm ässe und schloofe.
Im Spärber het d Fasnacht Wälle gschlaage,
das kasch an kai andere Ort ibertraage.
Vyl Massage wärde haimedloos,
und steen am Spalebärg duss uf dr Strooss.

Am Spalebärger «Wook of Fame»

Stoot jetz e Zircher «House of Shame !»

Aber unseri scheenschi Gass blybt trotz allem **in !**

Vyl feyni Lääde und d Fauteuil Theater sin immer **win-win !**

Au d Gränzgänger sin syt unzellte Joor

im Spärber Stammgescht gsi, und zwoor
scho domols bim Otti Bärswyl,
isch unseri Gligge gärn und vyl
ins Hotel Basel zum ässe und Pfuuse,
und nur im Notfall wider uuse !
D Auschtere-Orgie – dank dr Esther
sin uns no presänt, als wärs erscht geschter !
Und hesch im Spärber ebbis gheert klimpere,
sins nit dr Esther iri Wimpere
es sin leeri Schale uf em Tisch,
wenn wider e ney Plateau aabegschlürft isch.

Gege die Schandtät für Basel kasch Di nit weere.

Mir wänn aber per Hommage s Hotel Basel no eere !!

Fir das bruuche mr weder Berooter no Wärber,

mir kreierte e neyi Fasnachtsfigur: **Dr Spärber !**

Dä isch fir d Fasnacht qualifiziert,

will er s ganz Joor beobachtet was z Basel bassiert !

Uff em Kopf e Vogel und – schlank oder rund –

e Goschdym vome ussgsperrte Spärber-Kund.

Spärberauge seen scharf und wyt,

seen Sache, wo e Huffe Lyt

nit wisse wänn, oder still abschrybe.

Aber d Spärber seen alles. wär was wo duet tryybe,

und was alles, wie s gsi isch, jetz nimm so ka blybe:

S nostalgisch beliebt Kiechli muess schliesse.

Dert kasch jetz kaini Film me gniesse.

Zwai muetigi Basler feen schynts nomool aa –

Mit em «Phantom of the Cinema»?

Z Basel an mym Rhy – in dr Staine bisch no drby !

in dr Märthalle isch dr Märt lang verby,

und Kaim fallt e bassemidi Nutzig y !

Drby isch die Kupple die zwaitzgreesch no Rom

In Basel – als kulinarischi Wältstadt- e Frässodrom !

Bruuch Stäbli: gseesch wider am Ranze vorby !

Z Basel an mym Rhy.

S Musical Theater isch nimm top.

In Wirgglikait e Monschter-Flop.

Die grosse Plän sin ins Wasser gfallte,

und versuffe, falls si kunnt, in dr neye Schwimmhalle.

Z Basel am mym Rhy – sin au d Rhybadhysli verby ?

Mit hüpfte, singe, Fahneschwinge,

wänn d Fän dr FCB uffwärts bringe !

Bim Liga-Rekonvaleszänt,

isch s gschämmig Treener-Pössel verby –

MOMÄNT !

Vom Dierschutz wurd ain sofort verklaggt,

wenn er mit eme Dääge e Vogel veerjaggt !

E Vogel isch au uff dr Blagette s Süschee.

Das zaigt und kaschs uff de Revers gsee,

dass au e Vogel, allem aa,

wenn s Material und s Umfäld stimmt, Erfolg ka ha !

Z Basel an mym Rhy sin d Maischterzytte verby !

Und no e schlächti Nochracht gits:

s Merian schliesst, au s Kaffi Spitz.

Bsitzer sin – heert me – Zircher Fraue,

däne kasch jo 'oddderrr'??? alles zuetraue !

E Zircher Kolonii z Basel am Rhy ???

Dr Mutz, d Heeli und s Hotel Basel sin jo scho drby !

s het ebbe zvyl Syyri im Statkultur-Wy !

Mir Gränzgänger sinn, wie immer, speziell,

an däre Fasnacht sogar bsunders aktuell !

S Hotel Basel hämmer an Waage kläbht:

dass am Cortège dr **Spärber** nomool uffläbht !!!

Vom Määntig znacht bis am Mittwoch demoorge kasch
uff em Minschterplatz und em Kasärnen-Areal d' Ladärne-,
d' Waagen- und Requisiyten-Uustellig go aaluege!

Kumm doch au in unsere Glygge-Käller an dr Theaterstrooss 20

www.graenzgaenger.ch